



NEGERI JOHOR

Warta Kerajaan

DITERBITKAN DENGAN KUASA

GOVERNMENT OF JOHORE GAZETTE

PUBLISHED BY AUTHORITY

MAJLIS DAERAH SIMPANG RENGGAM 2014

AKTA KERAJAAN TEMPATAN 1976

UNDANG-UNDANG KECIL VANDALISME

(MAJLIS DAERAH SIMPANG RENGGAM) 2014

Pada menjalankan kuasa yang diberikan oleh seksyen 73 (1), 102 dan 102A Akta Kerajaan Tempatan 1976 [*Akta 171*], Majlis Daerah Simpang Renggam membuat, dan menurut seksyen 103 Akta tersebut Pihak Berkuasa Negeri mengesahkan, undang-undang kecil yang berikut;

Nama, pemakaian dan tarikh kuat kuasa

1. Undang-undang Kecil ini hendaklah dipakai hanya di kawasan Majlis Daerah Simpang Renggam dan hendaklah mula kuat kuasa pada tarikh disiarkan dalam *Warta*.

Tafsiran

2. Dalam Undang-undang Kecil ini, melainkan jika konteksnya menghendaki makna yang lain-

“binatang” termasuk burung, serangga dan hidupan air;

“harta Majlis” ertinya apa-apa harta alih atau tidak alih yang dipunyai, dibina, diurus disewa atau di selenggara oleh Majlis yang terletak atau ada di dalam, di bawah atau di atas mana-mana tempat awam atau tempat persendirian di dalam kawasan Majlis dan apa-apa harta mana-mana pihak atau orang yang berkontrak dengan Majlis yang digunakan bagi maksud memenuhi atau melaksanakan kontrak itu dan termasuk kerja yang dijalankan oleh Majlis dan mana-mana binatang, pokok, tumbuhan-tumbuhan, rumput, sungai, tasik dan anak sungai yang di bawah penjagaan atau kawalan Majlis;

“kerja” ertinya mana-mana kerja yang dijalankan oleh Majlis di bawah mana-mana undang-undang bertulis yang ada di dalam, di bawah atau di atas mana-mana tempat awam atau tempat persendirian di dalam kawasan Majlis;

“Majlis” ertinya Majlis Daerah Simpang Renggam;

“tempat awam” mempunyai pengertian yang sama seperti dalam Akta Kerajaan Tempatan 1976;

“tempat persendirian” ertinya mana-mana tempat selain daripada tempat awam;

“Vandalisme” ertinya perbuatan membina-sakan atau merosakkan harta benda awam, termasuk kesalahan-kesalahan yang disenaraikan dalam Undang-undang Kecil 3, Undang-undang Kecil ini.

“Yang Dipertua” ertinya orang yang pada masa itu menjalankan kewajipan-kewajipan jawatan Yang Dipertua Majlis Daerah Simpang Renggam dengan sah di sisi undang-undang dan termasuk Timbalan Yang Dipertua.

Kesalahan-kesalahan

3. Tiada seorang pun boleh, melainkan jika kebenaran atau baginya diberikan secara bertulis oleh Yang Dipertua-

- (a) menulis, melukis, mengecat, menyembur, menanda, mencakar, mencalar atau mengukir apa-apa perkataan, slogan, karikatur, simbol atau apa-apa jua pun pada mana-mana harta Majlis;
- (b) melekatkan, menampalkan, menunjukkan atau apa-apa poster, pelekat, iklan, surat, tempelan, peringatan, kertas atau apa-apa dokumen pada mana-mana harta Majlis;
- (c) menggantung, menyangkut, menaikkan, melekatkan, mempamerkan atau menunjukkan apa-apa bendera, panji-panji hiasan, panji-panji bendera, bendera lambang atau yang menyerupai perkataan slogan, karikatur, lukisan, tanda simbol atau apa-apa barang pada mana-mana harta Majlis;
- (d) memaku, mengikat, menyimpul atau merantai apa-apa benda pada mana- mana harta Majlis;
- (e) mencuri, mengalih, mengganggu, mengusik, memindah, mencacatkan, memusnahkan atau merosakkan apa-apa harta majlis;
- (f) membuat ubahan kepada apa-apa harta Majlis;
- (g) mengalih, memindah, mengusik, mencacatkan, merosakkan atau memusnahkan apa-apa jua yang dipertunjukkan, digantung, didirikan, diletakan, dinaikkan atau disangkutkan oleh Majlis;

- (h) meludah, kencing atau membuang air besar di dalam atau pada mana-mana harta Majlis kecuali di tempat yang disediakan bagi maksud itu;
- (i) mengotorkan atau mencemarkan air di mana-mana pancutan air, kolam renang, sungai, tasik atau anak sungai yang di bawah penjagaan dan kawalan Majlis;
- (j) memotong, menggali, mengalih, memetik, membantun, merosakkan atau memusnahkan mana-mana pokok, tumbuh-tumbuhan, bunga, daun atau dahan mana-mana pokok atau tumbuh-tumbuhan, atau rumput yang di bawah penjagaan dan kawalan Majlis;
- (k) mengorek, menambak, melonggokkan atau mengalih tanah dari mana-mana harta Majlis;
- (l) memerangkap, menangkap, membunuh, memberi makan atau mengganggu apa-apa binatang yang di bawah penjagaan dan kawalan Majlis;
- (m) menunggang, memandu, menolak atau menarik apa-apa kenderaan sama ada yang digerakkan secara berswat atau dengan cara lain atau meluncur dengan skate pada mana-mana harta Majlis yang bukan untuk maksud itu; atau
- (n) membuat apa-apa yang boleh menyebabkan kerosakan harta Majlis.

Penalti

4. Mana-mana orang yang melanggar mana-mana peruntukan Undang-undang kecil ini adalah melakukan suatu kesalahan dan apabila disabitkan boleh didenda tidak melebihi dua ribu ringgit atau penjara selama satu tempoh tidak melebihi satu tahun atau kedua-duanya.

Kuasa mengalih dsb.

5. (1) Yang Dipertua atau mana-mana pegawai Majlis yang diberi kuasa secara bertulis oleh Yang Dipertua boleh –

- (a) mengalih apa-apa benda yang didapati tergantung, dinaikkan, ditampal, diikat, disimpul, dirantai, dipakukan, diletakkan, disangkut, dipertunjukkan atau dipamerkan pada mana-mana harta Majlis yang berlanggaran dengan Undang-undang kecil ini; atau
 - (b) memadamkan apa-apa tulisan, gambar, lukisan, tanda, cakaran, calar atau ukiran yang dibuat oleh mana-mana orang pada mana-mana harta Majlis yang berlanggaran dengan undang-undang kecil ini;
- (2) Apa-apa tindakan yang diambil oleh Yang Dipertua atau oleh mana-mana pegawai Majlis yang diberi kuasa secara bertulis oleh Majlis di bawah perenggan 5(1) tidak boleh ditafsirkan sebagai menghalang mana-mana orang daripada dikenakan pendakwaan bagi apa-apa kesalahan terhadap mana-mana peruntukan undang-undang kecil ini.

Kuasa Mengkompaun

6. (1) Yang Dipertua atau mana-mana pegawai yang diberi kuasa secara bertulis oleh Yang Dipertua boleh mengikut budi bicaranya mengkompaun mana-mana kesalahan di bawah Undang-Undang Kecil ini dengan sejumlah wang tidak lebih daripada lima ratus ringgit.

(2) Pembayaran wang itu mestilah dibuat dengan wang tunai, atau dengan kiriman wang, yang dibuat untuk dibayar kepada Yang Dipertua, Majlis Daerah Simpang Renggam dan dipalang dengan perkataan "Akuan Penerima Sahaja"

(3) Pembayaran boleh diserahkan sendiri kepada orang yang membuat tawaran mengkompaun, tetapi jika diantar dengan pos, hendaklah dialamatkan kepada Yang Dipertua, Majlis Daerah Simpang Renggam

(4) Tiap-tiap bayaran yang diterima mestilah dikira sebagai wang kepunyaan Majlis Daerah Simpang Renggam dan suatu resit rasmi mestilah dikeluarkan baginya kepada orang yang telah diberi tawaran kompaun itu.

(5) Borang dalam Jadual Undang-Undang Kecil Mengkompaun Kesalahan-Kesalahan Kerajaan Tempatan (Majlis Daerah Simpang Renggam) 2011, hendaklah digunakan bagi mengkompaun tetapi boleh diubahsuai sebagaimana yang perlu.

Penyitaan

7. (1) Apa-apa barang yang berkaitan dengan mana-mana kesalahan di bawah Undang-undang Kecil ini boleh disita oleh Yang Dipertua atau mana-mana pegawai yang diberi kuasa secara bertulis oleh Yang Dipertua dan boleh ditahan pada mana-mana tempat atas risiko pemunyanya.

(2) Apa-apa barang tak tahan lama yang disita di bawah perenggan 7 (1) Undang-undang Kecil ini boleh dilupuskan mengikut cara yang ditentukan oleh Yang Dipertua pada bila-bila masa.

Kos dan pampasan

8. (a) Mana-mana orang didapati bersalah melakukan kesalahan di bawah Undang-undang Kecil ini hendaklah membayar kepada Yang Dipertua apa-apa kos yang ditanggung oleh Yang Dipertua bagi melaksanakan peruntukan-peruntukan Undang-undang Kecil 5 dan 7 termasuklah kos penyimpanan dan hendaklah membayar pampasan kepada Yang Dipertua bagi apa-apa kerosakan yang dilakukan terhadap harta Majlis semasa perlakuan kesalahan itu.

(b) Jika dilupuskan dengan cara jualan, pendapatan jualan, ditolak perbelanjaan, hendaklah, jika dituntut, dibayar kepada pemilik barang tetapi jika pendapatan itu tidak dituntut dalam masa (30) hari dari jualan, ia akan menjadi harta Majlis.

Pemansuhan, kecualian dan peralihan

9. (1) Tertakluk kepada perenggan (2) apabila Undang-undang Kecil ini mula berkuat kuasa, Undang-undang Kecil Vandalisme (Majlis Daerah Simpang Renggam) 2003 yang telah diwartakan melalui J.P.U. 75 Tahun 2004 (selepas ini disebut Undang-undang Kecil termansuh) hendaklah terhenti berkuat kuasa dan hendaklah disifatkan telah dimansuhkan.

(2) Walau apapun perenggan (1)-

- (a) tiada apa-apa jua yang terkandung dalam Undang-undang Kecil ini boleh menghalang mana-mana orang daripada didakwa atau dihukum di bawah Undang-undang Kecil termansuh bagi apa-apa kesalahan yang dilakukan di bawah Undang-undang Kecil termansuh sebelum mula berkuat kuasanya Undang-undang kecil ini;
- (b) apa-apa prosiding di bawah Undang-undang Kecil termansuh yang belum diputuskan sebelum mula berkuat kuasa Undang-undang Kecil ini hendaklah diterangkan di bawah Undang-undang Kecil termansuh seolah-olah Undang-undang Kecil ini tidak dibuat;
- (c) apa-apa lesen yang telah dikeluarkan di bawah Undang-undang Kecil termansuh hendaklah terus berkuat kuasa dan mempunyai kuat kuasa sehingga tamat tempoh baginya ia telah diberikan tetapi ia hendaklah tertakluk kepada peruntukan-peruntukan Undang-undang Kecil ini dan mana-mana peraturan dan boleh dibatalkan di bawah dan mengikut Undang-undang Kecil ini; dan
- (d) apa-apa perlantikan atau penguatkuasaan yang dibuat di bawah Undang-undang Kecil termansuh hendaklah berkuat kuasa dan mempunyai kuat kuasa seolah-olah ia telah dibuat di bawah

Undang-undang Kecil ini, sehinggalah perlantikan atau penguatkuasaan itu dibatalkan atau disatukan di bawah Undang-undang Kecil ini.

Bertarikh pada:

[MDSR/UNDG/01(A)(XXX).JLD.1]

HAJI ABDUL KARIM BIN ABU BAKAR
Yang Dipertua
Majlis Daerah Simpang Renggam

Disahkan pada:

[PUNJ. Bil.(PU2) 7 Jilid 4(8)]

SHUBANAH BINTI YUSUF
Jurutulis Majlis Mesyuarat Kerajaan
Johor